

ke nia hathatano, ke kiloagna na “Horara”. Gie regia na hava ke nia vuavuha, meke toetokelagagna.¹¹ Gie nia vetula, “Na thepa keda kotu mekeda tapurese, na hava i katura mana hava ke sagaro”, Meke ağai.¹² Meke ağai, na thepa ke kotu meke tapurese na komi thağı hava i katura mana hava ke sagaro. Ma a God ke regia na hava ke eia, meke toetokelagagna.¹³ Na lavi ke halii, mana vuovugoi ke mai, iañeni na vatologna na dani.

¹⁴ Ma a God ke vetula, “Keda mono mai na komi silada kori maaloa i popo, ġi keda thevurua na dani mana boñi, na komi vaugithatha, egna na komi thevu i vinoga, mi eigna na komi magavu mi eigna na vinoga, mana turugugna na komi thevu i vinoga:¹⁵ kedana siasilada tagna na maaloa i popo mekedana vahinara na maramagna”; ġie ağai.¹⁶ Ma a God ke vuavuha e rúa na silada ke hutu, na aho keda tagaolaginia na dani mana vula keda tagaolaginia na boñi; ġie vuavuha gua na komi vaitugu.¹⁷ Meke talura na komi hanu ke siasilada kori maaloa, ġi keda vahinara na maramagna,¹⁸ mekedana tagaolaginia na dani mana boñi, ġi keda thevurua na raraha itagna na puni. Gie regia na hava ke vuavuha meke toetokelagagna.¹⁹ Na lavi ke halii mana vuovugoi ke mai, iañeni na vavatigna na dani.

²⁰ Ma a God ke vetula, “Na bea keda vavuraga na komi hanu i haihavi, na manu keda thovo i popo”; meke ağai.²¹ A God ke vuavuha na vuavula, mana komi hanu i haihavi ke vuraga kori bea, mana komi manu. Gie regia na komi hava ke vuavuha, me toetokelagagna.²² Gie vatokera tagna na vetula iaani: “Na komi hanu i haihavi kori bea keda vuraga mekeda duaduala kori horara, mana komi manu kedana vuraga.”²³ Na lavi ke halii mana vuovugoi ke mai, iañeni na valimagna na dani.

²⁴ Ma a God ke vetula, “Na thepa keda vuraga, na komi hanu kaukağu na bali vahoru, mana komi hanu i kaukağu ke hutu meke iso, mana komi hanu i kaukağu ke asi”; meke ağai.²⁵ Ma ġie vuavuha na komi hanu i kaukağu na bali vahoru, mana komi hanu i kaukağu ke hutu meke iso meke asi. Gie regia na hava ke vuavuha me toetokelagagna.

²⁶ Ma a God ke gagua, “Mi keaġaieni kotonluda vuavuha na tinoni, na tinoni keda vagada i tolugita mekeda mono haidu duada. Gi keda thaba puñusira, na komi fei, mana komi manu,

mana komi hanu i kaukağu na bali vahoru, mana komi nanu i kaukağu ke iso meke hutu meke asi.”²⁷Ma a God ke vuavuha na tinoni; ke vagagna na nunujugna a God; a vuavuha na mane mana vaivine. ²⁸Gie vatokera kori vetula iaani, “Koroda duaduala. Gi ara varimiu keda mono tovuhia na maramagna, ġi kedana batura na komi hanu ġouġovu. Inau ku tamathaginia na mana vanigamu, eidia na komi fei mana komi manu, mana komi hanu i kaukağu ke iso meke hutu meke asi.”²⁹Ma a God ke gagua, “Inau ku hegamu, koroda gania na komi katura mana sagaro,³⁰mi vanira na komi hanu ke kaukağu, ke hutu meke iso meke asi, mi vanira na komi manu, Inau ku hera na gadia na komi vusu i gai.” Gie aġai. ³¹Ma a God ke regia na hava ke vuavuha meke toetokelagagna. Na lavi ke halju mana vuovugoi ke mai, iañeni na va onogna na dani.

2 Ke aġai ke vaġovua na maramagna mana komi fata i koradia. ²Mi tagna na vavitugna na magavu a God ke vaġovua nigna na aġutu, mi tagna na magavu iañeni ke nia mamatho. ³Ke vatokea na vavitugna na magavu, meke vili tavoga, eigna tagna na dani iañeni ke vaġovua nigna na vuavuha meke nia mamatho.

⁴ Iañeni na taetavetidia na maramagna, mana komi fata ġouġovu kori maaloa ke nira vuavuha.

Na komi dani, a Lord God ke vuavuha na maramagna mana komi fata ġouġovu kori mana, ⁵ke teo mua na hava ke havi kori thepa, mana komi katura ke boi kotu mua, eigna ke boi vetula mua na uha kori maramagna, ke teo mua ahai keda aġutu kori thepa. ⁶Toke ke teo na uha, na bea ke buabulala hadi mai kori thepa meke vagnubua na maramagna. ⁷Ma a Lord God ke birehia na mane tagna na maumavu i thepa meke aheahē kori ihugna na aheahē i havi, meke nia havi na mane.

Na mathathe Eden

⁸Ma a Lord God ke jouā na mathathe i Eden, i eta, ġie talua īneñeni na mane ke birehia. ⁹Ke eira na komi thaġi gai ke toke, ġie kotu meke tapurese meke sagaro gothapa. Mi kori varihotagagna

na mathathe ke mono na gai i Havi ke ado vathaothadoga eigna na toke mana dika.

¹⁰ Na bea ke sasalala au mai i Eden, meke vagnubuagna na mathathe, meke thevurua na bea itagna e vati na base. ¹¹ Na ahagna na bea ke nago Pishon; Iañeni ke sasalala kililivia i Havilah.

¹² Mi itagna kena pada na gold ke gnagura, mana soisoi ke bibitiana mana gahira ke mela kena kiloagna “Onyx”. ¹³ Na ahgna na varuai bea ke kiloagna Gihon; ke sasalala kililia na thepagna i Cush. ¹⁴ Na vatolui bea kena kiloagna Tigris, ke sasalala i etagna Assyria. Mana vavatigna na bea Euphrates.

¹⁵ Ma a Lord God ke hatia na mane, meke talua kori mathathe i Eden, gi keda kalitia mekeda reiregia. ¹⁶ Gie gagua vania na mane, “Koda ganira na komi sagarodia na komi gai itagna na mathathe, ¹⁷ mi sikei vamua na gai ke ado vathaothadoga eigna na toke mana dika, gi koda sagoi gania na sagarogna. Gi o eia, koda thehe.”

¹⁸ Ma a Lord God ke gagua, “Ke boi toke na mane keda mono gehegna. Inau kuda vuavuha a kulagna ma a hathegna.”

¹⁹ Ma gié hatia kekeha maumavui thepa, meke birehira na komi hanu ke kaukağu, mana komi manu, meke hatira mai itagna na mane, gi keda kiloragna soasopa ahadia, mana aha na mane keda kiloragna keda talu ahadia. ²⁰ Manea ke hera soasopa na komi ahadia, na komi hanu ke kaukağu na bali vahoru, na komi manu mana komi hanu kaukağu ke asi. Meke teo mua na duagna mana hathegna.

²¹ Ma a Lord God ke eia na mane gié nere magoli, mi kori neregna mua, a God ke bioa sina huli gaögärognna, gié goi ponotiagna kori vinahi. ²² Gie birehia na vaivine itagna na huli gaögäro ke bio aua itagna na mane. Gie talañia mai iia itagna.

²³ Mana mane ke gagua,

“Kori vağovugna, Iaani ke vagağu inau,
na huli ke hati aua kori huliğu,
mana vinahi ke hati aua kori vinahigu ‘vaivine’ kuda kiloagna,
eigna ke hati aua kori mane.”

²⁴ Na vunegna iaani na mane keda bugae sanira a tamagna ma a idogna mekeda thañu tagna a taugna, gi koroda sikei.

²⁵ Koro sakai soesole, mokoro boi maomamo.

Na tinoni ke kutu kori koakoa

3 Na poli ke thaothadoga vano tadia na komi hanu ke kaukağu, a Lord God ke vuavuha. Na poli ke huatia na vaivine, “A God ke pukuni velegamu, irogamu koroda sagoi ganira na komi sagaro kori mathathe?”

² Na vaivine ke gagua, “Kuru tañomana na ganiragna na kori sagaro i gai ġouġovu kori mathathe, ³ Sikei vamua na gai ke mono kori varihotagigna na mathathe, ġi a God ke velegami kuruda sagoi gania na sagarogna ba kuruda sagoi tañolia, ġi kuruda eia, kuruda thehe.”

⁴ Na poli ke goi hagore tugu, “Iaani ke boi tutuni. Koroda boi thehe. ⁵ A God ke velegamu iañeni, na vunegna ke adoa, ġi itagna koroda gania, koroda hatia na thaothadoga.

⁶ Na vaivine ke regia na gai ke fuafuagna, mana sagarogna ke toke na dodorogna. Gie gagana, hava rae toke, ġi keda hatia na thaothadoga; Gie hatia kekeha sagarogna na gai meke gania. Me hatira kekeha sagaro me hea a taugna, Moro sakai gania. ⁷ Me boi hauhaugna koro gania na sagaro, mo koro thaothadoga, ġi oro adoa koro soesole. Mo koro pama na eloelo i gai moro pipisi.

⁸ Tagna na lavi iañeni, koro roñovia a Lord God ke taetaveti kori mathathe, ġi oro polagoginia varihotagidia na komi gai. ⁹ Ma a Lord God ke kiloa na mane, “Ivei igoe?”

¹⁰ Mana mane ke hagore tugu, “Inau ku roñovigo itagna na mathathe, ġiu matagu mu polohaginigo, na vunegna ku soesole.”

¹¹ A God ke huatia, “Ahai ke velego ko soesole? Ba oro gania na sagaro ku lutia vanigamu koroda sagoi gania?”

¹² Na mane ke hagore tugu, “Na vaivine ko vuavuha vaniu ke heu na sagaro ġi kuda gania, muku gania.”

¹³ Ma a Lord God ke huatia na vaivine, “E hava ġio eia iaani?”

Mi iia ke gagua, “Na poli ke pilau na ganiagna.”

God ke tuturi awa na mono papara

¹⁴ Ma a Lord God ke ania na poli,

“Eigna iaani koda mono papara,

igoe vamua koda hatia nafafarañagi iaani.

Turugu keaġġieni mekeda

vano koda taitani kori kutumu, ke ġaru na vaña gania.

¹⁵ Rogamu na vaivine koroda veisiruhaginigi,
mane mana poli koroda vei thevuokagi.

Mara na mane keda na thabuhia na ulumu,
mi igoe koda gathatia na kokotodia.”

¹⁶ Gie gagua vania na vaivine,
“Inau kuda vasethea na papara kori boeboteamu,
mana vavahagiti kori vahuhumu;
mokoda talu magnahaginia a taumu,
gi keda vunagi puñusigo.”

¹⁷ Ma ġie ania Adam, “Eigna igoe ko roñovia
a taumu moko gania na sagaro ku lutia vanigamu na ganiagna.
Na vunegna na hava ko eia, na thepa keda fasarañagi.

Mokoda agutu hutu leulegu magavumu,
Gi keda vavuragna na vaña keda nabamu.

¹⁸ Keda kotu mekeda tapurese na kaukaru mana buburu
vanigo,

mi igoe koda gania na hava ke hai kotu.

¹⁹ Igoe koda susuġula mokoda agutu hutu,
gi keda kotu na vaña kori thepa,

Mo giagilai tabiru kori thepa itagna ko turugu mai.

Eigna igoe ko turugu mai kori thepa,

mi goe koda goi thepa tabiru.”

²⁰ Na mane ke kiloagna a taugna Eve,* eigna iia na idodia na
komi tinoni. ²¹ Ma a Lord God ke eia na pohe kori guiguli hanu
ke kaukaġu, rodia a Adam ma a taugna meke vapipisira.

Ke paji aura Adam ma Eve kori mathathe

²² Ma a Lord God ke gagua, “Keaġaieni na mane ke vagada
igit, na vunegna ke adoa na hava ke toke mana hava ke dika.
Keana keda sagoi lubatia na ganiagna na sagarogna na gai i havi,
mekeda talu havi.”

²³ Ma a Lord God ke paji aua tagna na mathathe Eden, meke
vetula gi keda agutu kori thepa tagna ke vuha mai. ²⁴ God ke paji
aua na mane, mi etagna na mathathe Eden, ke boa na boo i

* Eve mathehu na gaganagna kori hagore Hebrew ku tonogna.

Cherubim mana gau ke vavana kena taitabiru kililia thevu mi
thevu. Irañeni kena reiregiagna ahai guae mai garania na gai i havi.

**THE BOOK OF GENESIS IN BUGOTU
560 P.**

**© B.F.B.S. 1973 2M.
ISBN 0 647 09340 5**